

TUTÚ CÚÚ ÒÚ NÍ CADÚHA TÉ PÈLÚ

Té Pèlú cáďũha-dé tutú quĩhíⁿ ndaha ñáyiú sàndáá iní tnúhu Yá Ndiõxí

¹ Yúhú té Xĩmú, àdi Pelú chi úú ðiú-í, xínú cuèchi núú Xĩtohó Jesucrìstú, chi mee-gă ní tendaha ñaha-gá xii-í xícá cùu-í càháⁿ-í tnúhu-gá. Te càďuha-í tutú-a sá cúú-xí nchàa nchohó ñáyiú sàndáá iní ñáhá xii-gá dàtná sàndáá iní-ndí-gá, te ducaⁿ chi Tătá-ó Dűtú Ndiõxí ní dácàháⁿ-gá iní-ó nĩ sàndáá iní-ó-gă, chi cùu-gá Yaá ío váha quide ndáá ndihí Xĩtohó Jesucrìstú Yaá dácăcu nihnu ñaha xii-o núú ùhú núú ndàhú. ² Te xicáⁿ táhù-í núú Yă Ndiõxí sá ùuⁿ-gá uuⁿ-gá ná cuita chindee chitúu ñaha-gă xii-ndo quĩhíⁿ, te ducaⁿ ïo váha cuu iní-ndó cùndecu-ndo, te ducaⁿ càda-gá chi ta cùtnuní-gá iní-ndó nàcuáa ndùu cuendá-gá, te ducaⁿ ta cùtnuní tucu iní-ndó nchàa nacuáa ndùu cuendá Xĩtohó Jesucrìstú Yaá cúú Xĩtohó-ó.

Nàcuáa quide ñáyiú ndècu ichi Xĩtohó Jesucrìstú

³ Te Yá Ndiõxí ío càhnu cuu-gá chi chindee ñaha-gá xii-o quide ndáá-ó ndècu-o datná cuiní mée-gă, te ducaⁿ chi cùtnuní iní-ó nàcuáa sàni iní Xĩtohó Jesucrìstú Yaá ní càháⁿ ñáhá xii-o. Te òré ní càháⁿ ñáhá-gă xii-o te ní cutnùní iní-ó să ïo càhnu cuu-gá te ío váha quide-gá. ⁴ Te ducaⁿ nĩ cutnùní tucu iní-ó nàcuáa ní càháⁿ-gá cada ñaha-gă xii-o, te tnúhu ní càháⁿ-gá-áⁿ ïo càhnu cuu-xi te ío váha, te nchoo nĩ sàndáá iní-ó tnúhu-áⁿ nũu xíăⁿ ñá túú-gă ndécú-ó

ìchi cuehé ichi duha te ni ñà túú-gã sání ìní-ó càda-o nándi sá cuèhé sá dúhá, te ní cuu vii ní cuu váha ìní-ó vìtna. ⁵ Te sá dúcáⁿ quide-gá te xíãⁿ ío nducu ndèe-ndo cada-ndo nchaa nacúaa càháⁿ-í-a, te nchòhó sàndáá ìní-ndó-gã dico ñá díú mèe-ni xíãⁿ chi tnàhá xíní ñùhu-xi cada ndáá-ndó cùndecu-ndo. Te núu quide ndáá-ndó ndècu-ndo te xìni ñùhu-xi tecú tnùnì-ndó tnùhu-gá. ⁶ Te núu tècú tnùnì-ndó te cùu-ndo ñáyiu xíní cotnì mee-xi, te núu cùu-ndo ñáyiu sàcòo tni mee-xi te xìni ñùhu-xi cunduu cahnu ìní-ndó cuèi nándi sá ná yãha-ndo cùndecu-ndo, te núu càhnu ìní-ndó te xìni ñùhu-xi cada ndáá-ndó cùndecu-ndo datná cuìní méé Yã Ndiõxí cada-ndo. ⁷ Te núu quide ndáá-ndó ndècu-ndo, te xìni ñùhu-xi ío cuu ìní tnáhá ndì mee-ndo nacúaa ndècu-ndo ichi-gá, te núu cùu ìní tnáhá ndì mee-ndo te xìni ñùhu-xi cuu ìní-ndó nchàa dava-gá tnàha ñáyiu-ndo.

⁸ Te núu sa ducaⁿ quide-ndo ndecu-ndo te uuⁿ-gá cuita ducaⁿ càda-ndo quíhíⁿ núu cuàháⁿ núu vëxi, te núu ducaⁿ quide-ndo te cùu-ndo cue ñáyiu ñá túú dàna ìní-xi xíndecu, te cuita cutnùnì-gá ìní-ndó nchàa nacúaa sàni ìní Xítóhó Jesucrìstú quíhíⁿ. ⁹ Te nchaa ñáyiu ñá túú cuìní ducaⁿ càda cuú-yu ñáyiu ñá túú tnàhí ndìxi túu ìní-xi sá Yã Ndiõxí sa ní ndada ndoo ní ndada nine-gá ìní-yu cuendá nchaa sá cuèhé sá dúhá ñí xóo cadá-yu, te ñáyiu-ánⁿ cúu-yu dàtná ìⁿ ñáyiu cuàá àdi datná ìⁿ ñáyiu ñá túú cùnùnì váha núú-xi, te ducaⁿ sãtnahá-xi cúu-yu cuendá sá dúcáⁿ quidé-yu. ¹⁰ Te xíãⁿ núu yúhú càháⁿ-í dóho nchaa nchòhó ñáyiu ndècu ichi Xítóhó Jesucrìstú, te ío nducu ndèe-ndo cada váha-ndo cùndecu-ndo cuendá cutnùnì ndáá

iní-ndó sǎ Yǎ Ndiǒxí ní cáháⁿ ñáhá-gǎ xii-ndo, te ducaⁿ ñǐ quide-gǎ chi ducaⁿ ñǐ cachí-gǎ cada-gǎ. Te vá ǐⁿ ndùu cani iní-ndó dàña-ndo ichi-gǎ, te núu vá dáñá ndée-ndó càda-ndo nchaa nacuáa càháⁿ-í-a. ¹¹ Te núu ducaⁿ na càda-ndo cundecu-ndo, te ío vii ío váha cada Yá Ndiǒxí queheⁿ cuèndá ñáhá-gǎ xii-ndo òré ná sàá-ndó nǔú ndécú Xítóhó Jesucristú táxí tnùnigǎ nchaa nduu nchaa quíú, te dǐu-ni Yaá-ǎⁿ cúú Xítóhó-ó te ní dácǎcu nihnu ñaha-gǎ xii-o nǔú ùhú núú ndàhú.

¹² Te ducaⁿ-ni quǐhi-í dandàcu iní ñáhà-í xii-ndo nchàa tnúhu càháⁿ-í-a cuèi sa xìní-ndó tnǔhu-án, te cuèi sàndáá váha iní-ndó nchàa tnúhu ndáá dácùaha-ndo. ¹³ Te yúhú quidé cuèndá-í sǎ ïo tàú-xi cáháⁿ-í dóho-ndo ñini ndecu-í ñuyíú-a cuèndá sǎ vǎ nácuànaa-ndo nacuáa cada-ndo cundecu-ndo. ¹⁴ Chi Xítóhó Jesucristú ní cachí-gǎ sǎ ñà túú-gǎ vai nduu cundecu-í ñuyíú-a te cuú-í. ¹⁵ Te ío nducu ndèe-í nducu-í nàcuáa cada-í cuèndá quendóo ndǐhi-ndo nchàa tnúhu càháⁿ-í-a, te cuèi na yǎha cuú-í dico vá nácuànaa-ndo cada-ndo nchaa nacuáa càháⁿ tnúhu sǎ dánèhé ñáhà-í xii-ndo vìtna.

Cue téé ní xini núú sǎ ïo càhnu cuu Xítóhó Jesucristú

¹⁶ Te sa ní dánèhé ñáhá-ndǐ xii-ndo sǎ ïo càhnu cuu Xítóhó Jesucristú. Te ní cachí tnúhu tucu-ndǐ nàcuáa cada-gǎ òré quixi tucu-gǎ, te tnúhu-án cúú-xí tnǔhu ndáá cuiti te ñá díú tnǔhu sǎ ñǐ sani iní cue ñáyiu ñuyíú-a cùu-xi, chi nchúhú ní xini núú-ndǐ nàcuáa ní quide-xi cútnàhá ní cutnùní iní-ndǐ sǎ ïo càhnu cuu Xítóhó Jesucristú. ¹⁷ Chi dàvá-án ïo váha ní quide Tǎtá-ó Dǔtú Ndiǒxí ní

quide càhnu-gá Xítóhó Jesucrìstú, te diu-ni dàvá-án nĩ cáháⁿ Dútú Ndiöxí ndéé andiú nĩ xáhaⁿ-gã xii Xítóhó Jesucrìstú: “Yòhó cúú-n Dèhe-í téé ío cùu iní-í, te ío cùdíí iní ñáhà-í xii-n”, duha ní xáhaⁿ Yă Ndiöxí xii Xítóhó Jesucrìstú. ¹⁸ Te nchúhú ní tecú dóho-ndí ní cáháⁿ Yă Ndiöxí ndéé andiú cùtnáhá ducaⁿ nĩ xáhaⁿ-gã xii Xítóhó Jesucrìstú, chi tnàhá-ndí ndécú-ndí ndihí-gá yucu núú dúcáⁿ nĩ quide càhnu ñaha Yă Ndiöxí xii-gá.

¹⁹ Te ndècu ndihí-o nchaa tnúhu ní cáháⁿ cue téé ní xóo cáháⁿ tnúhu Yă Ndiöxí ndéé sanaha te nchaa tnúhu-án càháⁿ-xí nchaa nàcuáa cada-xi vitna, te cùtnuní iní-ó sã tnúhu ndáá cúú-xí, te xini ñuhu-xi cada cuendá váha-ndo nchaa nacuáa càháⁿ tnúhu-án, chi tnúhu-án cúú-xí dàtná ñⁿ ñuhú dáyèhé-xi ndéé òré véxi túndaá quéné chòdíní cáhnú dáyèhé-di. Te ducaⁿ sãtnahá-xí cùu tnúhu-án chi quide-xi nacuáa cutnùní iní-ó cuendá Xítóhó Jesucrìstú. ²⁰ Te xini ñuhu-xi sá ïo-gá cada cuendá-ndó sã ñà túú ñăyiu tecú tnùní ni ñⁿ tnúhu sá nĩ chídó tnùní cue téé ní cáháⁿ tnúhu Yă Ndiöxí ndéé sanaha, te núu Yă Ndiöxí vá cadá-gã nàcuáa cutnùní iní-yu nàcuáa càháⁿ nchaa tnúhu-án. ²¹ Te cue téé-án ío ní xíndecu yiñuhu-güedé núú Yă Ndiöxí, te nchaa tnúhu sá nĩ cáháⁿ-güedé-án ñà túú cùu-xi tnúhu sá nĩ cahu iní méé-güedě, chi Espiritú Yă Ndiöxí ní dácáhu ñí ñáhá-xí xì-güedé nàcuáa cunduu tnúhu cáháⁿ-güedé.

2

Cue téé càchí sá càháⁿ tnúhu Yă Ndiöxí te ñà ndáa

¹ Te ndéé sanduu chi ní xíndecu cue téé ní xóo dandàhú ñáhá xì ñăyiu israhél càchí sá càháⁿ

tnúhu Yá Ndiöxí te ñá ndàá sá càháⁿ-güedé tnúhu-gá, te ñu-ni ducaⁿ tùcu cundecu cue téé dandàhú ñáhá xii-ndo vitna, chi cachí-güedé sá càháⁿ-güedé tnúhu Yá Ndiöxí te ñá ndàá. Te cue téé-áⁿ ïo yìdáhu càháⁿ-güedé, te nchaa tnúhu càháⁿ-güedé-áⁿ dacuïta nihnu ñaha-xi xii-ndo te núu na tédóho-ndo, chi cue téé-áⁿ vã nñuu-güedé sá Xitohó Jesucristú ní xihí-gá cuendá-güedé. Te sá dúcáⁿ càda-güedé ío-gá ndíhi dacuïta nihnu-güedé méé-güedé. ² Te vãi ñáyiú xínu iní-yu cada-yu nándi sá cuéhé sá dúhá cuendá sá dúcáⁿ càda cue téé-áⁿ, te cuendá xiáⁿ ngóo ñáyiú càháⁿ úhú-yu cuendá ichi Yá Ndiöxí. ³ Te mee-ni tnúhu sá ñi cahu iní cue ñáyiú ñuyíú-a danèhé ñáhá-güedé xii-ndo, te quesaha-güedé sá cúú-xí tnúhu ndàá te ñá ndàá cuendá-ni sá cuñaha-ndo díhúⁿ xii-güedé, chi ñu-ni xiáⁿ tnàhí cuhuⁿ iní-güedé, dico Yá Ndiöxí sa ní cunaha ndècu túha-gá cuendá cada ndàá-gá cuéchi-güedé, te na sàá nduu te cuïta nihnu duuⁿ-güedé, chi Yá Ndiöxí vá nácuànaa-gá ñⁿ sá ñi cachí-gá cada-gá.

⁴ Te Yá Ndiöxí ñá túú ní quide cahnu iní-gá sá ñi quide cue espíritú ñá túú ní cuini cada ndàá xínu cuéchi núú-gã ní cùu, chi ní dáquihíⁿ ñáhá-gã xii-xi ñⁿ xichi núú ïo ndòho-xi ndecu-xi, te xiáⁿ cundedí nihnu-xi ndéé sáá nduu cuïta nihnu duuⁿ-ná-xi. ⁵ Te Yá Ndiöxí ñá túú ní quide cahnu tucu iní-gá nchaa sá ñi quide ñáyiú ñuyíú díhna, chi dàvá-áⁿ ñi dándáá-gã ndute ñuyíú ñi càhá nchaa ñáyiú ndècu ichi cuéhé ichi duha te ñⁿdi-ni té Nöé ndíhi úsá-gá tucu cue ñáyiú cùu ndi mee-dé ní dácacu nihnu-gá. Te té Nöé-áⁿ cúú-dé téé ní càháⁿ dóho-yu nàcuáa cada váha-yu cundecú-yu ni cùu te ñá túú

ní cuení-yu. ⁶ Te Yá Ndiöxí ní dǎngávǎ-gǎ ñuhú ní dánáá-gǎ ñáyiú ñuú Sòdomá ndìhì ñáyiú ñuú Gòmorrá te mee-nǎ yáá ñí nduu ñuú-án. Te sá dúcáⁿ ñí cuu xǎⁿ cútnùní iní-ó nàcuáa cada ñaha Yá Ndiöxí xii nchaa ñáyiú ñá túú quide váha. ⁷ Dico té Löt téé ní quide ndáá ní xíndecu ñíⁿ ñuú-án dǎvǎ-án chí ní dácǎcu nihnu ñaha-gǎ xii-dé. Te nchaa ñáyiú ñuú núú ñí xíndecu-dé-án ïo ní xínduu cuihna iní-yu, te mee-ni ìchi dǐí iní ní xíndecú-yu, te sá dúcáⁿ ñí xóo cadá-yu xǎⁿ ïo ní ndíhú iní té Löt. ⁸ Te ñíⁿ nduu ñíⁿ nduu ní xóo cada ndàhú-xi iní té Löt-án cuendá nchaa tnúhu cuèhé tnúhu duha ní xóo cáháⁿ-yu ní xóo cundedóho-dé, ndìhì cuendá nchaa sá cuèhé sá dúhá ñí xóo cadá-yu ní xóo quiní-dé, te mee-dě ní cuu-dé ñíⁿ téé ní xínduu vii ní xínduu váha iní-xi núú Yá Ndiöxí. ⁹ Te sá dúcáⁿ ñí yáha té Nöe ndìhì té Löt, xǎⁿ cútnùní iní-ó sǎ Yá Ndiöxí ïo chindee-gá cue ñáyiú quide ndáá ndécú ìchi-gá cuendá sá vǎ cadǎ-yu nándi sá cuèhé sá dúhá cuèi nándi na ndòhó-yu cundecú-yu. Te Yá Ndiöxí càchí-gá sá ncháá ñáyiú ndècu ìchi cuèhé ìchi duha sa ndècu túha-yu sá quíhìⁿ-yu núú ùhú núú ndàhú nduu nà yáha cundáá cuéchi-yu.

¹⁰ Te uuⁿ-gá cada ñaha Yá Ndiöxí xii nchaa cue téé ndècu ìchi dǐí iní, te dàquee tíhú-güedě nchaa tnúhu sá sánú ìchi ñaha xii-o nacuáa cada-o cundecu-o, te cùu-güedé cue téé ñíⁿ iní-xi, te yíⁿ iní-güedé, te ñá túú yùhú-güedé cáháⁿ úhú-güedé cuendá nchaa espíritú cúnú. ¹¹ Te cue espíritú xínú cuèchi núú Yá Ndiöxí ïo cùnuu-xi dacúxí cuè téé-án, dico ñá túú cùyíⁿ-xi cáháⁿ-xi dàtná càháⁿ cue téé-án òré ndàcáⁿ cuéchi-xi núú Yá Ndiöxí cuendá nchaa sá quidé cuè espíritú cündìhì yucu ñávǎha.

12 Te nchaa cue tée dandàhú ñáhá xii-ndo-án cúu-güedě dàtná cue quitì, chi cue quitì-án ñá túú ndècu sá xìnì tnùnì-güedi, chi cue quitì-án ñí cacu-güedi sá tníí-ó-güedi te cahni-o-güedi. Te ducaⁿ sãtnahá-xi cùu nchaa cue tée-án, chi càháⁿ cuèhé-güedé cuendá ndëdani càa espíritú cuèi ñá túú xìnì-güedé ná espíritú cúu-xí, te diu-ni mee-güedě dácũta nihnu-güedé mée-güedě sá dúcáⁿ quide-güedé, ¹³ te sáá nduu te nacháhu-güedé nchaa sá quidé-güedě-án, te cuèi nduu cuèi niú cúdí ìní-güedé quidé-güedě nchaa núú sã cuèhé sá dúhá sàni iní-güedé. Te òré nàtacá-ndó càda-ndo ìⁿ vico chiñuhu-ndo Yá Ndiõxí te chitnahá ñáhá-güedě xii-ndo, te cada dusaⁿ-güedě sá cúdí ìní-güedé sá dándàhú ñáhá-güedě xii-ndo, te dícó sácáⁿnũú cuãha ñaha-güedě xii-ndo dùcaⁿ na cada-güedé.

14 Te nchaa cue tée-án òré xìnì-güedé ìⁿ ñáyiu dñí te ndñi-ni sàni iní-güedé cáháⁿ ndñi ñaha-güedě xii-yu, te ñá túú ndùu vétú iní-güedé cuendá nchaa sá cuèhé sá dúhá quide-güedé chi uuⁿ-gá uuⁿ-gá sání iní-güedé cada-güedé. Te cuáháⁿ-güedé dándàhú-güedé nchaa ñáyiu ñá túú ñihí ndéé càda ndáá cuendá canchicúⁿ nihnú-yu nchaa tnúhu càháⁿ-güedé. Te mee-ni nchaa sá ndécú ndñi tnaha ñáyiu-güedé cúu ìní-güedé, te cue tée-án cúu-güedě cue tée duuⁿ duuⁿ sa ní xíta nihnu núú Yá Ndiõxí. ¹⁵ Chi cùu-güedé cue tée vá cánì-gã iní-xi cada ndáá, te nchìcúⁿ nihnu-ná-güedé quidé-güedě nàcuáa ní xóo cada ndí Bàlaám déhe ndí Bèór, chi ndí Bàlaám-án ñí xóo tnahá iní ndí cada ndí chùuⁿ cuehé nàcuáa ní xóo ñihí ndí dñí. ¹⁶ Te Yá Ndiõxí

ní quide-gá ní cáháⁿ bŭrru ndíi ní tenàà ñáhá-dí xìi ndíi cuèndá sá vǎ cádá ndíi ìⁿ cuèchi sàni iní ndíi cada ndíi ni cùu. Te sá dúcáⁿ ñí cuu xǎⁿ ní nguítuu ndíi ñá túú ní quide ndíi ìⁿ sá ñà túú nàndíhi sàni iní ndíi ni cùu.

17 Te nchaa cue téé ducaⁿ xǐquide cùu-güedé dàtná ìⁿ doco yìchí, te cùu tucu-güedé dàtná ìⁿ vícó sǎ xídó tǎchí te ñá túú dǎú nchídó-xí, te sa ndècu túha ìⁿ xichi núú ïo nee quíhíⁿ-güedé cundecu-güedé ni caa ni quíhíⁿ. 18 Te cue téé-án càháⁿ-güedé dàtná càháⁿ ìⁿ téé ío cùu cahnu dico ñá túú vèdana nàndíhi nchaa tnúhu càháⁿ-güedé, te cue téé-án dándàhú-güedé nchaa ñáyiu íchí ní dáñá ìchi cuèhé ichi duha, te xǎhaⁿ-güedé xíi-yu sá cúú-ní càdá-yu nchaa sá cuèhé sá dúhá quide nchaa ñáyiu ndècu ichi díí iní, 19 te xǎhaⁿ tùcu-güedé sá cúú-ní càdá-yu nání véxi iní-yu cuèi sá vǎha te cuèi sá cuèhé, dico mee-güedé chi mee-ni sǎ cuèhé sá dúhá cùnuu quide-güedé. Te nchaa ñáyiu ñá ndácú dàña nándí sá cuèhé sá dúhá cùu-yu dàtná ìⁿ ñáyiu xìnu cuechi ñá túú tnàhí dàña quee núú chíúⁿ pàtróóⁿ-xí. Te ducaⁿ sǎtnahá-xi cùú-yu chi ñá ndácü-yu dàñá-yu nándí sá cuèhé sá dúhá quidé-yu. 20 Te núu ñáyiu sa ní dáñá nchàa ichi cuèhé ichi duha cuèndá sá ñí cutnùní iní-yu nàcuáa ndùu tnúhu Xítohó Jesucristú, Yaá ní dácǎcu ni-hnu ñaha xìi-o núú ùhú núú ndàhú ná nànchocáva iní-yu cundecu tucú-yu ichi cuèhé ichi duha, te mee-nǎ sá cuèhé sá dúhá tàxi tnuní ñáhá-xí xìi-yu, te núu ducaⁿ te vǎa-gá tucu cadá-yu dàcúxí dàtná ní xóo cadá-yu cútnàhá vátá cútnùní-gá iní-yu nàcuáa ndùu tnúhu-gá. 21 Te váha-gá sá vǎ ngǔnu

ichí-yu ichi ndáá ní cùu te ñá díú sǎ sà ní ngúnu ichí-yu te ní dáñǎ-yu nchaa tnúhu-gá sá sà ní níhǐ-yu ndècu ndihí-yu sànu ichi ñaha-xi nacuáa cundecú-yu ni cùu. ²² Te ñáyiú ducaⁿ xǐquide quèe ndáá-xi nàcuáa cuáháⁿ ìⁿ cuèndú sá cǎchí-xi: “Iná ní nacaxi-di sá ñǐ ndusaⁿ-di, te cùchí quiti íchí ñǐ xichi ndute cãndoo cuáháⁿ-ni tucu-di cuchi ñuhu-di núú ndèhyú”, duha cuáháⁿ cuèndú-áⁿ.

3

Xítóhó Jesucrístú quixi tucu-gá

¹ Te nchaa nchòhó ñáyiú ío cùu iní-í cùtnuní iní-í sá ìo váha sàni iní-ndó, te xéhé cúu-xí tütú cúu úú cǎdũha-í sá cúu-xi-ndó, te ìⁿ-ni cǎháⁿ-í dándàcu iní ñáhà-í xii-ndo nchaa tnúhu sá sà ní xíndedóho-ndo.

² Chi cuèní-í sá vǎ nàcuànaa-ndo nchaa tnúhu ní cǎháⁿ nchaa cue tée ní xóo cǎháⁿ tnúhu Yá Ndióxi ndéé sanaha, te ni vǎ nàcuànaa-ndo nchaa tnúhu ní cǎháⁿ cue tée ní cǎháⁿ tnúhu Xítóhó Jesucrístú Yáá ní dǎcǎcu nihnu ñaha xii-o núú ùhú núú ndàhú, chi ñiú nchaa tnúhu-áⁿ sánú ìchi ñaha-xi xii-o nacuáa cada-o cùndecu-o.

³ Te ío-gá xíní ñùhu-xi cutnuni iní-ndó nàcuáa cada-xi òré vátá sǎá-gá nduu quixi tucu Xítóhó Jesucrístú ñuyíú-a, te cǎchí tnúhu-í xii-ndo sǎ cùndècu ñáyiú cuhuⁿ iní mee-ni nchaa sá cuèhé sá dúhá te mee-ni xǎⁿ cadá-yu, te cǎháⁿ cuèhé cǎháⁿ duhá-yu cuèndá tnúhu Yá Ndióxi. ⁴ Te cachí-yu: “Ñá ndáá sá quixí Xítóhó Jesucrístú ñuyíú-a, chi núu quixi-gá te sá ndéé ama-gá sa ní quexio-gá ní cùu. Te dàtná-ni quide-xi vitna ñiú-ni duha ní quesaha-xi quide-xi ndéé cútnàhá ní ngáva ñuyíú, te ñiú-ni duha quide-xi ndéé cútnàhá ní xíndecu cue ñani tnáhá-ó ndéé sanaha, te ñiú-ni duha

quide-xi ndéé ní sáá nduu ní xíhí-güedé, te diu-ni duha quide-xi ndéé vitna”, duha cáháⁿ-yu. ⁵ Te ñucùuⁿ cadá-yu vá cadá cuendá-yu sá Yá Ndiöxí ní cáháⁿ-gá te ní ngúndecu andiü ndìhi ñuyíú-a, te diu-gá ní quide ní quene ñuhu yìchí xítí ndute ní ngúndecu-xi ìⁿ xio. ⁶ Te ìⁿ xito ní dándáá Yá Ndiöxí ndute ñuyíú-a ní dánáá-gă nchaa sá íó. ⁷ Te Yá Ndiöxí ní cachí-gá sá cúndècu-ni ñuyíú-a ndìhi andiü ndéé ná sàá nduu càda-gá nchaa nàcuáa ní cáháⁿ-gá sá cúú-xí nchaa ñáyiü ndècu ichi cuehé ichi duha, te dàvá-áⁿ danàa-gá nchaa ñáyiü-áⁿ chi cáyú andiü ndìhi ñuyíú-a.

⁸ Te nchaa nchòhó ñáyiü ío cùu iní-í, ío cuhuⁿ iní-ndó tnùhu na càháⁿ-í-a, chi Yá Ndiöxí ñá túú sàni iní-gá dàtná sání ìní méé-ó, te ìⁿ nduu cùu-xí datná úxí cièndú cuíá, te úxí cièndú cuíá-àⁿ cúú-xí dàtná ìⁿ nduu sá cúú-xí-gă. ⁹ Te Yá Ndiöxí ñá túú dàna ndodo iní-gá vá cadá-gă ìⁿ sá càháⁿ-gá dàtná càchí cue ñáyiü sá dáná ndòdo iní-gá cada-gá ìⁿ sá càháⁿ-gá, chi ñucùuⁿ tnahí dàcaca-gá nduu cuendá sá ío cùndahú iní ñáhá-gă xii-o, te cuíní-gá sá ncháá ñáyiü ndixi túu iní-yu sá ñà túú quide váha-yu ndècú-yu te tuhá-yu ichi-gá, te ducaⁿ quide-gá chi cuíní-gá sá vă cuíta nihnu ni ìⁿ-yu.

¹⁰ Te dàtná quidé cuè ñadúhú quìhu-güedé ìⁿ vehe dùhu-güedé òré ñá túú yìhi iní xítóhó vehe-áⁿ, te ducaⁿ càda Xítóhó Jesucrìstú chi nduu ñà túú yìhi iní ñáyiü ñuyíú-a quixi tucu-gá, te dàvá-áⁿ cada-xi andiü dàtná quidé-xí òré níhi vìhi caháⁿ ñúhu, te diu-ni òré-áⁿ ndoñuhu àndiü, te cáyú nchaa chódíní, te cáyú tucu tnàhá ñuyíú-a ndìhi nchaa sá íó.

¹¹ Te vitna nchòhó sa xíní-ndó sã náá ñùyíú-a

te xíãⁿ ío xìni ñuhu-xi cada váha-ndo cùndecu-ndo, te cada-ndo nàcuáa cuìní méé Yă Ndiöxí cunduu. ¹² Te ío nducu ndèe-ndo ducaⁿ cada-ndo cuendá ducaⁿ ndihí-ni sáá nduu càda-gá nchaa nàcuáa càháⁿ-gá, te ducaⁿ nchòhó cundecu túha-ndo sáá nduu-ãⁿ. Te ñu-ni nduu-ãⁿ ndoñuhu àndiu chi cáyú-xi, te ñu-ni ducaⁿ ndoñuhu tucu nchaa chódíní chi ndihí-ñi cáyú. ¹³ Te nchoo ndètu-o sáá nduu cùndecu-o ñⁿ ñuyíú sáá, te quíní-ó ñⁿ andiu saa datná ní cachí Yă Ndiöxí, te yàcáⁿ chi mee-nă cue ñáyiú quide váha cundecu.

¹⁴ Te nchòhó ñáyiú ío cùu iní-í, ñini ndètu-ndo sáá nduu dùcaⁿ cada-xi ío nducu ndèe-ndo cada-ndo mee-ni sá váha cundecu-ndo ichi Yă Ndiöxí, te cundecu nahi-ndo, te cada-ndo nchàa nacúáa vá cùndècu cuéchi-ndo núú-gá. ¹⁵ Te ío cada cuendá-ndó sã dácaca-gá nduu dùcaⁿ cada-gá chi cuìní-gá sá ncháá ñáyiú naníhí tàhú-yu. Te té Păblú tée ío cùu iní-ó ndècu ndihí-o ichi Xítóhó Jesucristú ñu-ni nàcuáa càháⁿ-í-a ñu-ni ducaⁿ ñi tee-dé ñⁿ núú tùtú ní dáquixí-dě ndaha-ndo, te ní tee-dé nàcuáa ní dácáhú ñni ñáhá Yă Ndiöxí xii-dé. ¹⁶ Te ñu-ni ducaⁿ càháⁿ-dé nchaa dava-gá núú tùtú cadũha-dé, te dava tnúhu càháⁿ-dé ío úhú tecú tnùní-ó, núú xíãⁿ ñáyiú ñă túú cùtnuní váha iní-xi, ñáyiú ío yáchí sàndáá iní-xi ñⁿ tnúhu, ñáyiú-ãⁿ tècú tnùní dátñi-yu nchaa tnúhu ní chídó tnùní-dé, ndihí nchaa dava-gá tnúhu yòdo tnuní núú tùtú Yă Ndiöxí, te sá dúcáⁿ quide-yu te dacuñta niñnú-yu mée-yu.

¹⁷ Te nchòhó ñáyiú ío cùu iní-í, sa cùtnuní iní-ndó nàcuáa quide dava ñáyiú, núú xíãⁿ ío xìni ñuhu-xi quihí iní-ndó cùndecu-ndo cuendá ducaⁿ cùndecu-ni-ndo ichi-gá, te vá dáñá-ndó

mèe-ndo dandahú ñáhá nchàa cue téé ndècu ichi cuehé ichi duha, chi cue téé-án ñà túú sàni váha iní-güedé cuendá tnúhu Yá Ndiöxí. Te núu na dàña-ndo mee-ndo dandahú ñáhá-güedě xii-ndo te vá cündècu váha-gá-ndó ìchi-gá dàtná ndécú-ndó vitna. ¹⁸ Te nchòhó uuⁿ-gá uuⁿ-gá cuita cutnùní-gá iní-ndó quíhíⁿ nchaa nàcuáa ta chìndee ñaha Xítohó Jesucristú xii-ndo cuáháⁿ. Te ducaⁿ ïo-gá cuita cutnùní iní-ndó nchàa nacuáa sàni iní-gá, te diu-gá cúú-gă Yaá ní dácăcu nihnu ñaha xii-o núú ùhú núú ndàhú. Te chí ná cächí-ó să ïo cãhnu cuu-gá cuěi vitna té cuěi ndée núú cuáháⁿ núú yěxi. Te ducaⁿ na cünduu. Te ío chí cádá ndèe iní-nă vitna.

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 3 Mar 2023 from source files
dated 29 Jan 2022

872f7754-0986-5ecd-a059-925a708a6939